

是，未為究竟，再加鞭策，看箇一歸何處？到這裏提撕話頭，無節次了也。惟有疑情，忘即舉之，直至返照心盡，是名法亡，始到無心處也。莫是究竟麼？古云，莫謂無心云是道，無心猶隔一重關。忽地遇聲遇色，磕著撞著，大笑一聲，轉身過來，便好道懷州牛喫禾，益州馬腹脹。

古拙禪師示眾

諸大德何不起大精進？對三寶前深發重願，若生死不明，祖關不透，誓不下山，向長連床上，七尺單前，高掛鉢囊，壁立千仞，盡此一生，做教徹去，若辦此心，決不相賺。如其發心不真，志不猛勵，這邊經冬，那邊過夏，今日進前，明日退後，久久摸索不著，便道般若無靈驗，卻向外邊，記一肚，鈔一部，如臭糟瓶相似，聞者未免惡心嘔吐，直做到彌勒下生，有何干涉？苦哉！

太虛禪師示眾

如未了悟，須向蒲團上冷坐十年二十年三十年，看箇父母未生前面目。